

Vun driweriwer

erscheint auf www.lenauheim.de

monatliche
Erscheinung

Juni 2018

von Helen Alba

Im Keller

Die schwowische Häiser in de Derfer han meischtens e Keller ghat. In meim Elternhaus is mer vum Gang aus in de Keller nuner gang. Uf aus Erd gstammte Trappe. Wann mer die Kellertier ufgemacht hat, war zu rechter Hand e Stellasch aus Metall. Dorte druf war all des plaziert, wu nit unbedingt im Keller weger em Kalte hat sin misse: die Schissl mit frische Aijer, Sodawasser-Flasche, Wasserkruch, e kleene Fettstänner. Gleich dernoh is de Krautstänner uf eener Trapp gstann.

Wann mer nuner in de Keller kumm is, do ware uf eener Seit die Weinfässer gstann. Uf der anri Seit awer war es Kallichloch. Scheen zwischer roti Ziegelsteen ware die Krumbiere, der Greess noh uf Haufe. Die Setzkrumber ware separat in Kischtle. Wanns gegers Fruhjohr gang is, han die Esskrumber geplickt gin misse. Mir han immer weißi un rosa Krumber ghat. Je nohdem was gekocht gin is, hat mer dann die geeignete Krumber verwend. Die weiße sin schneller verfall, die rosa dergeije nit.

Ach es Grienzeich, die Gelriewe, Paschkernat un Zeller sin ingschlaa gin in dem Keller. Des heescht, sie ware eeni Wurzel noh der anri im Sand gstoich. Ach die rote Riewe sin im Keller ufghob gin.

Selmols han mer jo noch ke Eiskaschte ghat. Im Keller hat die Wassergieß, die dick Millich, Milone im Kiehle druf gewart, gebraucht zu gin. Alles hat sei bestimmtes Platz ghat, dass jedes Familienmitglied sich in dem Keller zurecht gfunn hat!

De Krahne verstoppt

Die Bäsl Liss hat es Tenn voller Hingle, Gäns, Ente un Puikle ghat. Es Johr war lang, mer hat doch versorcht wille sin. Wann se e Gans gschlacht hat, is des Fleisch scheen uf Porzione ingeteelt wore. Zuallerersch hats am gleiche Tach e Ingemachssupp vun dem Knochiche (Berzl, Buckl, Hals, Flitschespitze) un Blut un Lewer gin. Des war dann meischtens am Samschtach. E Tach druf sin die Schunge un Flitsche gebrod gin. Die Bruscht hat die Bäsl Liss immer ausgebaandelt, es Fleisch gemahlt un for am Owet sin dann so e Art faschierti Werschtle mit Salat ufgetischt gin.

So war des a mol an eem Sunntach. Korz vor em Mittachleite war es Esse fascht fertich un die Bäsl Liss saat iwer ihre Mann: „Joschi, hol die Weinflasch un geh se in de Keller fille. Zu dem Gänsebradl kann mer e Spritzer vertraan. Vergess nit, ach e Sodawasserflasch mitzubringe“. De Vetter Joschi verzieht es Gsicht, doch er geht gehorsam in de Keller. Un kummt noh eener Weil mitm Sodawasser un der leeri Weinflasch in die Kich. „Ich men Lissi, de Krahne am Fass is verstoppt, es laaft nix raus“! Es Lissi schaut ne schief un skeptisch an, holt die Weinflasch un geht selwer in de Keller, ihr schwant was. Un wirklich, sie kloppt an des Fass, es klingt hohl. Also wars leer. Wiedich kummt se zuruck un schennt wie e Rohrspatz: „Du Nixnutz, was eener bischt. Wann hascht dann de Wein gsoff? Noh meiner Rechnung misste noch wenschtens 20 Liter in dem Fass sin! Un dass ich der iwerhaupt nix ansiehn han! Des bringt mich ganz aus der Rawasch. Siffko warscht un bleibsch! Ich will e Spritzer trinke, es is awer nix do! Scheer dich momentan in de Keller un zapp des anri Fass an“!

Des hat de Joschi ach gemacht. Noh em Mittachesse is die Bäsl Liss in de Keller un hat de Krahne runderum erscht mit eem Fetze, dernoh mit Klebeband ingewickelt. Un derezeit war de Krahne nimi verstoppt un de Wein ach nit ausgedunscht!